

Samþykktir fyrir Bjarkarhlíð

1. gr.

Nafn og aðsetur

Samtökin heita Bjarkarhlíð – miðstöð- fyrir þolendur ofbeldis. Samtökin eru samstarfserkefni Reykjavíkurborgar, félags- og húsnaðismálaráðuneytis, innanríkisráðuneytis, Lögreglunnar á höfuðborgarsvæðinu, Samtaka um kvennaathvarf, Stígamóta, Mannréttindaskrifstofu Íslands og Kvennaráðgjafarinnar.

Aðsetur samtakanna er Bjarkarhlíð við Bústaðaveg, 108 Reykjavík.

2. gr.

Tilgangur samtakanna

Tilgangur samtakanna er að stofna og reka miðstöðina Bjarkarhlíð sem er miðstöð fyrir fullorðið fólk sem hefur verið beitt ofbeldi, meðal annars til að:

- a. Samhæfa þjónustu og úrræði fyrir þolendur ofbeldis á einum stað.
- b. Efla fræðslu, þekkingu og umfjöllun um eðli og afleiðingar ofbeldis, vera miðstöð upplýsinga og fræðslu um málefni sem tengjast ofbeldi og fylgjast með rannsóknum og nýjungum í málaflokknum.
- c. Bæta þjónustu fyrir hópa í samfélaginu sem aukin hættu er á að verði fyrir ofbeldi.
- d. Stuðla að þverfaglegri samvinnu aðila sem vinna með málaflokkinn m.a. með að búa til samstarfsvettvang opinberra aðila og frjálsra félagasamtaka sem eru með þjónustu við þolendur ofbeldis.
- e. Skapa hlýlegt og öruggt umhverfi þar sem þolendur ofbeldis mæta skilningi og þekkingu á aðstæðum sínum.

3. gr.

Tilgangi samtakanna skal náð meðal annars með því að:

- I. Veita þjónustu fyrir einstaklinga 18 ára og eldri þegar þess er óskað.
- II. Veita samþætta þverfaglega þjónustu með aðkomu samstarfsaðila á sviði félagsráðgjafar, lögfræðilegrar ráðgjafar, sálfræðiráðgjafar, áfallavinnu, upplýsingagjafar og fræðslu.
- III. Vera samstarfsvettvangur aðila sem vinna með brotaþola ofbeldis og stuðla að fræðslu, námskeiðum og umfjöllun um málefnið.
- IV. Vera miðstöð upplýsinga sem tengjast málefnum þolenda ofbeldis.

- V. Halda úti heimasíð um ofbeldi og afleiðingar þess og koma upplýsingum um ofbeldi á framfæri við fjölmiðla og samskiptamiðla.
- VI. Stuðla að útgáfu og dreifingu efnis um ofbeldi.
- VII. Eiga samstarf við sambærilega aðila hérlandis og erlendis.

4. gr.

Aðild

Aðilar að samtökunum eru Reykjavíkurborg, félags- og húsnæðismálaráðuneyti, dómsmálaráðuneyti, Lögreglan á höfuðborgarsvæðinu, Samtök um kvennaathvarf, Stígamót, Mannréttindaskrifstofa Íslands og Kvennaráðgjöfin. Þessir aðilar skrifuðu undir viljayfirlýsingu um þróunar- og samstarfsverkefnið Bjarkarhlíð þann 4. október 2016.

5. gr.

Stjórnskipulag

Aðalfundur fer með æðsta vald í málefnum samtakanna. Á fundum samtakanna fer einn fulltrúi þeirra sem að samtökunum standa með eitt atkvæði og ræður einfaldur meirihluti úrslitum nema annars sé sérstaklega getið í samþykktum.

Starfstímabil félagsins er almanaksárið.

Stjórn samtakanna skulu skipa fulltrúar allra aðila að samtökunum, einn fulltrúi frá hverjum og einn til vara. Stjórn er skipuð til eins árs í senn en formaður stjórnar er kosinn til tveggja ára á aðalfundi. Formaður stjórnar má aðeins sitja tvö kjörtímabil í röð. Stjórnarfundur er löglegur ef einfaldur meirihluti stjórnarmanna sækir fund.

6. gr.

Aðalfundur

Aðalfundur fer með æðsta vald í málefnum samtakanna og skal hann halda árlega eigi síðar en í aprílmánuði. Skal boða til aðalfundar með minnst tveggja vikna fyrirvara með sannanlegum hætti. Aðalfundur er löglegur ef rétt er til hans boðað.

Dagskrá aðalfundar skal vera sem hér segir:

1. Kosning fundarstjóra og fundarritara
2. Skýrsla stjórnar
3. Afgreiðsla ársreikninga síðastliðins árs
4. Fjárhagsáætlun yfirstandandi árs
5. Breytingar á samþykktum
6. Kosning formanns stjórnar
7. Kosning skoðunarmanns reikninga
8. Önnur mál, sem upp kunna að vera borin

Til aðalfundar skal boðað með fundarboði sem senda á með sannanlegum hætti til allra aðila samtakanna með tveggja vikna fyrirvara og skal fundarefnis getið í fundarboði. Fundarboði skal fylgja ársskýrsla ásamt ársreikningi árituðum af skoðunarmanni samtakanna.

7. gr.

Stjórn

Stjórn skal móta og hafa eftirlit með störfum samtakanna, þ.á.m. taka ákvarðanir um ráðningar starfsfólks og allar meiriháttar fjárhagslegar ákvarðanir sem teknar eru utan aðalfundar. Stjórnarfundir skal halda mánaðarlega eða oftar ef þurfa þykir. Stjórn skiptir með sér verkum.

Stjórn skal rita fundargerðir þar sem bókaðar skulu niðurstöður hvers máls sem tekið er fyrir á fundi.

8. gr.

Fjármál.

Stjórnin skal afla samtökunum starfsfjár og hafa eftirlit með vörslu og meðferð fjármuna. Í upphafi skulu stofnaðilar leggja samtökunum til stofnfé samkvæmt nánara samkomulagi. Nýir aðilar skulu leggja til sambærileg framlög. Að öðru leyti gerir stjórn samtakanna tillögur um fjáröflun til reksturs samtakanna m.a. með almennum fjárstyrkjum frá einkaaðilum og opinberum aðilum og með framlögum til einstakra afmarkaðra verkefna.

Teymisstjóri Bjarkarhlíðar ber ábyrgð á vörslu og meðferð fjármuna, annast fjáröflun fyrir samtökin meðal annars með styrkumsóknum og vinnur fjárhagsáætlun í samráði við stjórn.

9. gr.

Málsmeðferð.

Fara skal með allar upplýsingar sem berast Bjarkarhlíð sem trúnaðarmál og skal meðferð þeirra ávallt vera í samræmi við ákvæði laga um persónuvernd og meðferð persónuupplýsinga. Þá skal öll öflun gagna og upplýsinga unnin í samvinnu við viðkomandi einstakling og leitað eftir samþykki hans þar sem því verður við komið.

10. gr.

Breytingar á samþykktum.

Samþykktum þessum verður aðeins breytt á aðalfundi með atkvæðum 2/3 hluta viðstaddra fulltrúa þeirra sem standa að Bjarkarhlíð og skal breytingartillagna getið og þeim lýst í fundarboði aðalfundar. Breytingartillögur skulu sendar formanni stjórnar í febrúarmánuði til afgreiðslu á aðalfundi.

Halldóra Dýrleifar Gunnarsdóttir, formaður stjórnar Bjarkarhlíðar